



I zegaineres ta Penìa

Inché Zot de Rola da Penìa l ve contarà la storia dei zegaineres canche la vea de Sèn Bastian i é rué sun piaz de Penìa.

Na dì d'invern con un gran tòch de neif e te un gran freit rua sun piaz de Penìa na familia de còrneres che jìa a la bater per se parèr la fam. La jent da Penìa, a i veder, la é sciampèda daite e l' à serà i ujes, azioché i no posse ite a ge robèr zeche. Chisc zegaineres i se ferma aló sun piaz davejin a la veia da l'èga dal bren, i lascia jù l ceston e duc à podù veder che l zegainer l'èa un pael te ceston e un muie de còcoi e pegnates e carnières, e duta la tràpoles che se दौरa a cojinèr. La fémena inveze l' à un bez te ceston che crida dal freit e da la fan, fagotà ite te un muie de penchies, dapò l'era amò dotrei bastèrc che corea stroz cigan e fajan madalenzes. L zegainer l ge tol jù de l'assa de Jan del Ros un brac de legna, l tiza l fech aló sun piaz te la neif, e l met sora un gran pael pien de orc e de èga. La fémena la tol un gran pugn de orc e la lo met a chejer, e ence un tòch de cèrn che la lo fèsc bossèr da si bec e da so on e la ge vaa sora e la disc: «Chest l' é l' último tòch de un bez che n' é mort, pere pìcol!» Madre Santiscima! La jent ta Penìa la é ence coriousa e i era vegnuì duc fora de cèsa e i se aea metù ló dintorn chisc zegaineres a veder che che i fèsc. A sentir che chisc zegaineres i volea se magnèr un tòch de cèrn de un bez, duc é jic a ge tor zeche: chi formai, chi pan, chi pomes, chi orc, chi cèrn de porcel o de feida, e duc i era contenc de poder giutèr con zeche, ma nesciugn se fidèa i lascèr daite, con chel freit che l'era.

Intanto chisc zegaineres i se fèsc na bona marena de orc e cèrn, e chi bastèrc contenc i se èa metù a ciantèr e a scigolèr e a sonèr l'òrghin. Ma vèrda mo coche la va canche l' é che s' é massa contenc! Ju de anter Parei vegnià un pere on... da... fora del bosch, vestì dut de bèrba de pecel, che l'era stat tel bosch a se injignèr mingol de legna. E tu, un bastèrt l crida adaut: «Vegn l' on dal bosch, vegn l' on dal bosch!», chisc zegaineres i à intenù inveze che vegn l' on dal bosch, l Salvan, e no i à domanà de auter: piens de paura e duc sprigolé, i taca a corer un fora per l' auter e i se raspa insem a sia tràpoles per sciampèr. Sta veia zegainera la se tol in prescia so ceston su la schena e la sin sciampa la pruma, e chi bastèrc amò dant con ac e sciusciures da no dir. L' ultimo a sciampèr l' é chel zegainer con so ceston su la schena e te man l pael con l' orc che chejea. Ma via Capitel l' é un toèl de giacia come un spieie e la veia zegainera che la jìa coran la é data in ventrons, che l ceston con bastèrt e dut l' é ruà ja pènt de Marugèna de Simon a se fermèr e la gabèna, che la era lèrgia, la g' é ruèda sora l cef che g' é restà dut descorì te dedò, capide ben, e te chel momento l' é ence sgolà l pael con l' orc che chejea, e per desgrazia l' à svetà dut sun chela pèrt descorida de chela zegainera, percheche l zegainer che l corea de sbalz, l'era rentà tel ciuch de la legna de Micel de Sofia, e l'era jìt in ventrons ence el. Madre Santiscima, podede ve imaginèr i ac e i sciusciures de chisc zegaineres e più de dut de chela veia con doi gran vescies sun chela pèrt descorida. Per fortuna che in chel dì l'era ruà ta Penìa l dottor Zòcol da Ciampedel ite che l se magnèa na copa de lat toch. Chest dottor l' à cognù ge onjer ite l mapamondo a sta zegainera con ròdol de brama, che l no n' èa de auter. Ma in chel dì l'era ence i gendarmi che jìa stroz ta Penìa; chisc i se branca chisc zegaineres e i li mena te busc dei conigli, ence se i era famé come cians. Per instouta la lascion coscita, ma ve à dita la verità, propio dut cant, chel bujère de Zot de Rola.